





寧極齋藁

擬騷

我思古人

陸君承之余畏友也其好古嗜學與余同而天  
資爽朗邈不可及暇日撰此辭遺之冀有以勵  
我也

緊古人之寥々兮夫何思之弗諉蹇余生之獨後兮曾不得與之

吳郡陳

深

子微

父





周旋曠斯世而勿見兮故增歎而永嘆撫遺籍而玄覽兮奉所聞  
之可尊彼丹心之耿著兮諒雖亡而實存苟翹風而遐契兮尚何  
有於古今覽元化兮無窮感祖景兮如駛余髮兮種々余懷兮疊  
々駟黃虬兮遐征仰超然之高軌猗聖言兮如天至道兮如海超  
鴻濛兮何極窺浩茫兮無涖孰導余以正適兮遵坦涂而容曳惟  
諒友之昭々庶訂余之憤々嗚呼噫嘻古之人兮惠我無疆忽不  
見兮心之傷余之思兮曷云其忘往者不可及來者猶可 非夫  
君之相和兮誰消搖以尚羊

古詩

送曹叔時歸淮東

羲農去我遠醇風日以澆遺經秘幽旨千載空寥々瀛洛導其源  
百川始東朝我生性顓蒙望道彌堅高鍼砭無良友窮居困煩囂  
東平曹叔子妙年振英翹古心默相契一語神情超高堂奏綠綺  
長空激商飈譚玄探要妙力學勦虛驕方期拾瑤艸歸袂何飄飄  
淮水白浩々楚山青遙々相思意無盡贈子一長謠

重玄寺旃檀林桂花



有桂生祇園團，擁旌蓋靈根。挺蟠錯翠色，深晦藹疑從。鷲峰移  
迴與蛾石對，寺有蛾眉山石商飈動閭闔。夜氣凝沆瀣，清芬彌六合。芳意  
函纖芥，華飄廣寒府。金布如來界，天空氛翳滅。罔涼月挂幽人  
夜禪起，淨想解清遊。時獨行真賞，聊自愛妍華。易銷落徒抱  
貞心在，蒼鸞寧復來。臨風發深慨。

姑蘇臺晚眺分韻得高字

殘陽古城曲，岌々荒臺高。不知何年創，尚爾結構牢。青山擁危楯，  
白水環空壕。美哉此山谿，慘澹悲雄豪。當時一戰霸，意氣何矜驕。

蛾眉坐傾國，忠魄隨怒潮。空餘故宮苑，寒雀飛野蒿。佳辰晤良友，  
清眺舒煩勞。夕風振藪薄，鴻鴈中天號。永懷五湖客，一舸凌雲濤。  
浩歌滄浪詞，願言從遊遨。

送釋存游苕川兼懷子昂學士

吳興山水邦，杳藹雲氣萃。岡巒抱縈迴，溪流瀉清駛。超遙烟中客，  
縹眇雲際寺。振錫赴幽尋，攬袂接遐契。是時秋正中，曠朗天宇霽。  
明月射神珠，光彩難自閔。漁歌和遺音，茶經詫幽事。欲從煙屨遊，  
苦為塵鞅繫。緬懷金坡英，歸來雲壑媚。采々白蘋花，因風為遙寄。



次韻陸承之歲莫述懷

鷓鴣晨先鳴絡緯夜織虛物情固有殊亦各競時急遙丘中士  
荆扉晝常閉賦詩悲徂年開卷懷往昔廓然一言得不願千金易  
大江流湯湯白日如過翼虛堂拂朱弦再鼓三歎息西山遺清風  
潁水有竒迹勗哉望前修猛志庶可及自當葆天和政不慕人益

孤鳳篇上靜軒閣學士

南山有孤鳳丹羽何威蕤朝餐瓊樹實夕飲天津池岐陽曾一鳴  
千載今無期將從和風翔俯視塵壤卑梁藻匪君食枳棘非君棲

遐舉崑丘陽肯為雲羅羈坐遲簫韶成振翮還來儀

送周必明北上

天寒霜霰繁歲晏日月駛周子何倉皇孤征詣燕薊寥寥抱遺經  
皦皦蓄幽志青雲旣交薦白首期一試蒼松多勁枝老鶴負竒氣  
扶搖信可搏高冥不難致泮林日彫踈子衿氣淪替側佇典刑人  
復理俎豆事明年候薰風矯音江南蒞願偕魯諸生敬攬叔孫袂

隴西太夫人壽八十

恒山鎮朔野積翠凌太虛中有仙子宅霞光抱雲居怡怡伯陽姥



八十顏猶朱神交殷王女祕字傳金書逍遙人間世靜壽仙者徒  
令子返烏哺專城綰菟符金章映彩服錦障承雕輿前有命婦掖  
後有玄孫扶春風溢慈幄曉日暉慶圖海桃摘霞實靈芝掇雲腴  
南山為爾壽北斗為爾斲人生天壤內菽水歡有餘矧茲壽且貴  
身與五福俱厚德獲隆報彼蒼默相孚詩人頌燕喜此樂不可渝

寄題天與清香臺

芳園轟會臺宛在江之曲何年植瓊樹粲粲紛在目美人夫容裳  
超遙處空谷時登月中觀玩此枝上玉幽芳忽吹來妙契心自足  
維皇豈虛畀真意盖有屬夜闌耿無眠霜散天地肅寥寥翠禽語  
葱朧曉光旭

簡秦章甫

章甫中飛文之禍得釋詩以道之

楚、洛陽生清介常寡與宦遊江之南移家寄吳渚辛勤奉旨甘  
言動無過舉陽春萬物新霈澤均施普乘風方高翔摧翊墮網罟



飛文中善類橫逆夫孰禦白日照丹心皦々中自許有能辨治長  
終然脫石父操存諒深固夷險咸善處涉難知彌明履變德益聚  
靜探元化心憂患真玉汝

慰陸子順喪偶

歲晏登禹陵山水清遊縱迴艫艤西湖堦篔簹諧伯仲旅牕燈焰青  
炊白感幽夢絕絃聞遺聲據藜發哀慟重憐游子情懼乏尊章奉  
淒風動虛幌斜月照飛棟芳膠解鈿朶流塵昏翠鳳荀香悵未歇  
潘詩應屢諷孤獸駭哀鳴離禽感幽哢蒙莊亦何人教倪自驚衆

遺情信良難至理堪折衷

題梅圖

玉妃還絳闕委珮煙江濱瑤華振英采照曜山水春海若不敢受  
謂是天上珍掌管倩姮氏封護煩滕神風標二公子素服靚且新  
邂逅蓬萊使翩然與相親畫師何從見泚筆開清真數幅懸高堂  
一洗凡格塵我欲商妙語喚起逋仙人

曹叔時見過索餞篇

泄雲蒙朝日微雨霑庭除幽人掩關卧門外無來車曹子別經歲



枉道過我廬謂余抱文藝胡為守鄉閭余曰匪高尚褊性涉世踈  
上奉白髮親餘暇讀我書豈如叔時甫妙年美名譽詞華爛綺繡  
問學滋新畬奉子一卮酒聊為譚斯須威鳳翔高閣逸驥騰雲衢  
及時樹遠業臨事毋踟躕

壽元俞治中

凱風蕩清淑秦溪鍾妙英世德裕後遠盛年振清聲余昔客君家  
君甫十二齡期君世濟美事業如甘卿微言副深望榮涂踐脩程  
東吳大藩地政繁任匪輕刺袂得終賈游刃新發硎勉奉兢、戒

毋著赫、稱臨下必以莊事上必以誠勤勞慎細事惠愛甦疲氓

制動由靜壹養心貴和平嘗聞公輔量允矣王休徵王祥為別駕世以公輔期之

勗哉樹佳政繼此崇令名

題梁中砥詩畫圖

中砥有送存書記詩云一聲兩聲松子落一片兩片楓葉飛夕陽在山新月上道人相伴一僧歸趙公子昂畫而為圖中砥索詩漫賦一首

山昏歸雲斂葉落夕飈驟踈松漏微月清光照巖竇煙中二仙師  
一笑欣邂逅行、撲空翠杖屨相先後清景適與期得句若天授  
畫成詩逾絕開卷消鄙陋如飲中冷泉可嚙不可嗽我懷陶貞白



日夕夢三秀何年卓茆庵餌术衍遐壽

丁酉元日

夜中不成寐卧覺風刺々殘寒賈餘勇飛雪猶厲慘黎明卷新霽  
旭日光暎暎窮陰得陽和春氣已先感負暄南軒下余生亦云忝  
高門誰能走蓬戶鎮常掩馳車聽奔湊慶語絕媚諂自甘守踈慵  
豈復歎坎壈濡毫寄柔翰隱几坐文毯壺傾酒不竭爐擁火始燄  
吐詠撥清新研書味真澹流光信難駐華髮那可染拊已欣有得  
感時能無憾貞告宜嘉遯心亨由習坎浮榮易盈歇神鑒常淵湛  
龜勉奉吾親力學深自貶

送沈彥楚

清才不數見世固未易識如玉在荆山落落混于石沈君義興彥  
恨我未良覲陸子不妄交稱許斯為得況有闕里孫延之致經席  
北聆道吳閭捧檄建德國高歌誦唐虞諸子有矜式巖灘浩煙霞  
山水澄鮮碧暇日一登臨清賞慰愁寂

別衛山齋

何處桃花源超然欲高舉永懷塵外游遐契煙中侶時從清夜闌  
默探元化祖尋幽得佳勝將期結茅宇任公五十牂竭來向江渚



投竿魚不食歸興浩莫禦遙岑下落日薄雲閣清雨揚舫吳松濱  
褰裳采芳杜長歌去英淑未卜重晤語相期會有時散髮卧雲嶼

送許希元尉德清

士生天壤內所抱者奇氣當觀人品高豈尚名爵貴子真第一流  
淪迹南昌尉至今疑仙去風節照百世希元人中豪未識我深愧  
嘗聞畜愛馬童子刺而斃略不動聲色度量有餘地豈易議淺深  
是固余所畏陸子少許可欣然紀其事邇聆尉山邑芒刃聊小試  
茗水清且迓茗民號難治願言化以德勿但施法制令聞起在今

微言毋我棄

題鄭柏窓所藏蓮社圖

白蓮生清池至潔塵不汙當時取名社亦以清淨故樂國初無有  
莽，果何處陶公寄醉鄉蓋溪得其趣公何挽不入謝何推不去  
遠師信高識心雜固不取盜循彼何人一見乃深許士固未易知  
身名期歲暮遺風驚千祀流落見緗素永懷名山遊樂與善人遇  
匡廬青拂天江水日東驚我將解世纏已辨登山具載酒酌淵明  
問津桃源路



內人臂白鸚鵡圖

華清宮中歌既醉南海奇禽遠爭致玉環最愛雪衣孃當時曾得  
龍顏媚璿房雕檻春日長繡裯嬌兒在傍戲君王憐汝解語言懷  
恩不說宮中祕臨風鷲鳥何軒々歎惜純良遭猛厲苔翁寫出當  
時事側立紅衫內人臂江花滿地不忍看空拂畫圖憐俊慧

壽金仁叟

嬌黃著柳回東風玉霽協瑞蜚璇穹金猊噓暖香霧濛銅槃蜜炬  
光如虹尊前笑挹南極翁海桃壓袖朝霞紅蒼々五桂雲籠從南

山翠色摩青空仁者靜壽如山崇世間凡語難形容

書駿馬圖

王良伯樂骨已朽曹霸丹青亦希有開圖歛見神駿姿對酒高歌  
雄劍吼祇今騏驥困監車落日長鳴謗昂首嗤々俗眼迷天機相  
士嫌貧馬嫌瘦

贈道眼相士

岳生年少精悍姿雙眸照人烟秋水氣直雲天亦自奇口譚風鑿  
政可喜一鶚盤空勢輕矯夕風吹波雲欲起海岸相逢話不休一



笑人間五百祀方瞳祇合相山中燕領自堪侯萬里人生出處難  
豫期浮雲變化無窮已巫咸一去不可追歸來心服壺丘子

近體 五言律

南遊

驅車登遠道白日忽西流宇宙驚新夢山河感舊遊雲迷江令宅  
月澹庾公樓已、知何柰長歌去國愁

晚望

莽、荒城下悠、古道傍秋風吹草木落日下牛羊感慨悲新事

登臨歎異方長吟意無極回首一霓裳

春日即事

忽、春將晚幽窓趣亦佳山蜂時入座野鼠晝緣階俗事何能已  
浮生信有涯莊書讀一尺聊復散幽懷

次韻贈錢德鈞

嗜書仍好古豐、一生心搜抉無遺隱幽憂不廢吟雲鴻渺何許  
煙海浩難尋悵望高深意秋空起暮陰

寄友



山中太王子以日復何如自恨數年別無因一寄書江湖驚老大  
日月暗銷除會晤無期在憑詩問起居

寄友

海內皆兄弟情深莫若君邨知經亂後翻作久離群皎々雲中月  
悠々巖上雲相思不可見清夢遶江濱

懷錢德鈞

城南寘徒侶錢子數來過翰墨相娛玩文章互切磨交遊常不厭  
間闊竟如何風雨懷君夜空齋秋思多

登陽山妙淨院

野寺雖牢落山僧亦自如幽栖鄰虎穴靈跡近龍居地勝軒楹古  
天寒草木踈憑高望城郭把酒一欵飲

賦月中桂

天上何年種嬰娉碧樹幽根蟠蟾窟古花落鷺峰秋祗恐冰輪礙  
時煩玉斧修素娥久延佇攀折使人愁

江上

放跡清江上悲歌惜歲窮孰能回白日我欲問蒼穹天地遺民老



山河霸業空清愁無著處卷入酒盃中

次韻沈冲叟見訪之什

卧疾蕭齋冷門深一徑苔空庭小雨過瘦馬故人來把酒悲新事  
論詩畏逸才未能親往謝病眼怕風埃

次韻沈冲叟間居即事

晨起盥櫛罷焚香默坐餘朝陽上窓戶寒雀下庭除隱几商清句  
開棧閱素書吁嗟望塵客徒解賦間居

會霜晴詩

旭日照蕭晨淒清不受塵冷光明似雪冬暖勝如春紅葉輝相照  
黃花色愈新南窓差可愛曝背豁天真

其二

朝瞰上高樹霧卷海天遥勁氣乘寒凝嚴威見日銷鐘清出遠寺  
馬滑恐危橋稍逼南枝暖踈花破寂寥

次韻陸承之寒夜有懷二首

客心驚歲莫不柰送愁頻茅屋夜來雪梅花江上春驅車斷行旅  
閉戶有高人奚待扁舟興風期暗與親



壯志寥々在流年冉々催寒鐙和夢照暗雨挾愁來白雪詞難和  
青山首重回夜闌渾不寐慨想陸機才

挽王伯英

之子尤謙抑親曾奉酒卮懷才嗟未用抱疾竟難治歲莫風霜慘  
天寒草木萎壯年今已矣慷慨有餘悲

送張德美北上

廓落江梅客素懷經濟才年高勞治邑道直恨無媒白髮絲千縷  
清風水一盃功名須老大行矣莫遲回

晚步分韻得吟字

偶諧二三子曳履古城陰遠慕求羊迹永懷江海心殘陽隱深巷  
積雨歇高林自笑黃琴曲那追白雪吟

送馮茂叔分教豐城

晉朝雷煥地君去是清遊神物今何處滄江空自流客程二千里  
吾道一扁舟徐孺祠前過汀蘋為薦羞

贈孝廉

海內知名士乘時各樹勳辭華咸彙進節行乃今聞清月升林表



白華開水濱緬懷純茂德遙睇楚山雲

送畊存大參使日本

東嶠久不庭抗疏出忠誠不憚殊方使期休四海兵長虹貫日白  
巨鷁壓波清笑下扶桑國歸來致泰平

陸賈初馳詔終軍已請纓上方顓委任南國誦威名挂席鵬風順  
敲舷蟬月明陽侯應拱護不遣海濤驚

挽褚雪巘高士

矯，環中叟

號環中子

清強八十餘平生山水趣盡力老莊書

嘗注黃老莊

鵠人間世白雲天上居蕉花吹又落回首一欵欵

所居種芭蕉又号蕉池叟

王太古偕遊靈巖余以事中止先還

峭，孤峰起蒼寒倚太虛尚嫌凡子到那被美人汗霸業消磨盡  
浮屠突兀居憑高怕淒愴興盡即迴艫

題潘臞齋容安書院

屋上即青山柴扉鎮日關煙霞三逕足天地一身閑歸去詞堪和  
閒居賦可刪簞瓢差自樂高視眇塵寰

送范竹所赴吳江學職



多士乘時出身涂志業優名家傳舊學文治佐新州六月江湖冷  
三山風雨秋應懷霸越祖落日望扁舟

送趙仲明還山東

東吳隱散曹解印脫煩勞案上留丹訣樽中有白醪北風淮水疾  
落日太行高遙睇雲飛處歸心正鬱陶

次韻高龍洲入道

軒車絕華念野服遂幽情白鷺臨溪迴玄蟬飲露清時龍洲棄家  
不如葦  
師季偉詩藥友通明且結煙中客誰論世上名

臯橋巖中道院與梁中砥商巖翁會飲

夙有巖中約今晨得來幽窓六人坐清思一時開雪下宜看竹  
天寒未見梅人生良會少莫惜共持杯

送王從政赴番易慈湖講席

揚子清而粹遙上江漢靈無人繼絕學有客抱遺經霜冷鴻飛磧  
秋晴馬在垌東逢山似象回首靜儀刑

從政和韻來謝復就荅之

并州沈厚士氣質得天靈吳下留三祀軍中講六經微雲點霄漢



清月出林垆載鼓汾亭曲令人識典刑  
牆東甘靜處詩思妙通靈堂有慈親奉門無穴客經佳兒誦書史  
深巷類郊垆應解莊周學全生不近刑

贈張受益檢校

山水經行遍蕭閑吏隱情劔寒光不泯鶴老骨逾清傾蓋逢知己  
論詩盍讓卿從來說張祐不是浪傳名

德刑相濟用自古意尤深肅殺冬神令慈祥使者心月明清驛路  
風色定寒林善政民應化毋忘魯叟箴

時受益監刑諸盜

悼亡

短日一何急寒宵不肯明霜寒那有夢月落重傷情壁凍琴絲斷  
風驚燭淚盈微言憶王衍達理悟莊生

次韻贈友

柴門饒野興不逐世浮沈父子詩書樂山林木石心玩雲聯晚句  
臥雪擁寒衾又欲移家去幽栖恐未深

溪居

閉關屏人事褊性樂深居琴罷更無事晝長宜讀書粉牆苔色古



檉葉竹行疎漸喜相知少門無穴客車

題沈華溪詩集

暑夕坐無寐把君詩獨謠才堪敵冰柱韻不減江蚺瘴海三年隔  
風沙萬里遙相逢欣有得傾篋盡瓊瑤

挽沈氏母夫人

允矣夫人德傳家慶有餘生存黃鵠慘死葬白龍居落月沉滄海  
浮雲散太虛曾為陶侃客酌酒重欵歔

近體  
七言律

曉望吳城有感

鳴、寒角動城頭吹起千年故國愁才見專諸操匕首旋聞西子  
載扁舟霜寒古寺鍾聲早月落南園樹影秋一笑浮華易盈歇白  
雲長在水長流

送劉梅溪遊句曲

華髮蕭、兩鬢秋醉眠花竹舊風流天心橋畔行將老  
肺山中隱去休半嶺白雲容可玩一庵明月尚空留  
趣赴方臺約巖下遙看二老遊  
劉居吳地  
天心橋  
劉有故  
西風  
庵山中  
句曲有四平山亦名方臺  
劉故入呂江蟾號四平翁



次韻叔時述懷

文學淵源百行餘，浮誇濶陋漢相如。  
性靈偏愛居山水，才大難堪奉簡書。  
毛義仕來身暫屈，揚雄老矣計全疎。  
強顏微祿營甘旨，已約煙霞共結廬。

次韻子封承之游桃花塢二首

二仲相從共此遊，濛濛花氣襲征袍。  
幾家綠暗藏深塢，一徑紅芳落野桃。  
春色暗隨流水去，客懷空逐暮雲高。  
臨溪忽動秦源興，應嘆浮生何太勞。

閭門行樂送韶華，閑訪城陰野老家。  
黃蝶得晴飛菜葉，翠禽隔浦啄桃花。  
衡門倒屣臨官路，古渡橫舟閣淺沙。  
亦有詩人時一到，醉吟行盡夕陽斜。

賀胡西軒入道

世外煙霞淨綺紈，天風吹夢遶笙鸞。  
清名久上丹臺籙，散秩新除紫府官。  
九醞霞觴分帝所，千秋銀榜表仙壇。  
蔡經一見心相契，應許親傳蛻骨丹。

胡禮蔡君為師

次韻王松陵



江上青山擁縣城江頭結屋放歌行散人昔有陸魯望處士今無  
襴正平萬頃雲濤聊自賞百年肝膽定誰傾何時適有扁舟興趁  
得垂虹夜雪晴

和龔翠巖雨中述懷韻

風流翰墨傳千古議論文章自一家靜愛雲林披白苧懶趨閭闔  
草黃麻江山故國閑停櫂風雨僧窓自淪茶甚欲從翁俱隱去雲  
深何處問桃花

雪後遊石湖二首

衆峰戴雪玉崔嵬風定湖光鏡面開山色可堪西子笑溪聲曾送  
粵兵來天寒野水搖孤艇日落浮圖對古臺回首風塵翳城闕愁  
來誰伴倒清壘

右汎湖

振屐重來事已非却憐清景不相違晴湖盡屬盟漚樂夜月還驚  
化鶴歸萬里吳船空野水百年庾宅尚斜暉醉哦昔日三高此千  
載何人復見幾

右范公農圃堂

送鄧覺非赴金陵學職

城南不得遂相羊又著綸巾出草堂李白杯中停月影米家船上



貫虹光西來江水知鄉近北望淮山引興長  
應傍荆公祠下過向來松竹尚蒼々

送潘臞齋赴會稽講席

四十臞仙鬢未班譚經海上看青山  
曹江壑口漫難讀禹廟梅梁去自還  
疊嶂曉晴詩筆銳平湖風定酒船閑  
曾聞百粵多奇士暇日清遊盍叩關

湯梅山為道士歸吳還山賦一詩以餞

三年獨向孤山住應為梅花滯水濱  
滄海鶴歸空有語荒城草長

又逢春芝田火暖丹砂熟松嶠花香白  
釀新安得與君俱隱去煙蘿深處著閑身

舟行邂逅周西園出示迴文詩就次韻

遊遨適興隨幽境笑語相逢忽並船  
流急濺抱飛帶雨岸回迷草暗浮煙  
樓高近水涵飛鳥樹密藏雲咽恨鶻愁  
破已空尊酒綠醉吟同眺晚晴天

贈吳江學掾

萬丈垂虹阿那邊君來山水愈清妍  
洞庭雲氣浮樽俎震澤濤聲



苔誦弦汀柳垂遮靈運笠江花飛落廣文氈此行適有稽山興謾  
繫春風載酒船

宿真元觀

汎汎春風湖上舟幽尋不覺到瀛洲碧桃花落門前地翠柳陰垂  
水際樓半夜鶴鳴松院靜一天星照石池幽瑤林疑有神仙隱願  
得相從物外遊

贈陸稼村

風雨雞鳴江上村祇今遺叟幾人存煎茶陸羽忘塵世學稼樊遲

老聖門百尺蒼松心不朽千年古井水無渾丹崖翠壁何從見一  
笑相逢醉竹根

澄虛觀玉皇閣次韻

巋然高閣鎮吳州妙手應煩玉斧修萬疊紅雲凝寶座一輪白日抱  
瓊樓濛濛灑氣疑浮蜃炯炯神光遠躡牛終待留侯辭富貴還來  
相伴赤松游

又代賦

狼籍風煙知幾秋嵬嵬傑閣煥然修移來世外神仙宅幻出雲中



天帝樓眺遠但知觀萬象養生應悟解全牛帝觴它日分餘瀝咫尺鈞天得夢遊

贈周山人

牀頭曾不置黃金野褐綸巾善陸沈七十康強疑有道一毫榮辱不驚心草根露冷露芒屨柏子煙清暖布衾時戲青囊看山水浩歌行入白雲深

又贈

郭范寥々數百年地仙還復出人間豁開天外一雙目看盡江南

千萬山玉指暗攢烏兔定金盤活捉虎龍環我今欲卜神仙宅霧豹何妨露一斑

餞楊世章

阿章年少懋才猷柏府當年與贊籌高卧久無求仕想閒曹聊作讀書謀風煙坐度吳江晚山水窮探禹穴幽政喜相逢又相別飛花不分灑離愁

送信甫之江東

儼屋吳城不厭貧江東初奉薦書新壯年才略須名世異國光陰



肯滯人官舍草生三月晚遺宮花落六朝春到時公事期程暇應  
有新詩寄我頻

挽湯桂橋

三楚名家有異孫昔年射策對君門青衫佐幙聲名重白首譚經  
道義尊天壤忽驚遺老盡衣冠今復幾人存小山桂樹傷愁絕賴  
有清香為返魂

又代挽

壯歲名登進士科青雲直上趁鳴珂子真遐舉神仙隱作尉玄晏

閑居製作多空掩高齋藏滂稟竟無良藥起沈痾諸郎毀瘠銜哀  
切為報門人廢蓼莪

送悅心北上

便乘天驥上通達笑拂吳鉞氣益奇徐庶交遊盡名士王維才藝  
重當時西風星斗寒芒動落日川原秋興悲莫向黃金臺上望霸  
圖消歇草離離

寄東臯叟

移家東去寄田廬始見高情與世疎愛酒定從焦革飲卜鄰應近



仲長居天寒埽雪催煎茗  
秋雨臨溪命罩魚  
靜裏獨全山野樂  
人間榮利不關渠

近體 五言絕句

題秋塘圖二首

寒塘淨如鏡  
雲冷水蒨秋  
溪鳥無情物  
悠々不解愁  
水落秋菰老  
夕寒煙樹微  
絕憐雙白鷺  
飛去似知幾

題畫扇騎驢踏雪

雪沒驢背白  
行々詩興催  
不因太清絕  
邨肯犯寒來

題錢舜舉寫生五首

石榴

萬里乘槎來錦衣  
驚盡炫相逢  
秋風中忽發一笑粲

青瓜

蒼然藍田姿  
幽懷瑩冰雪  
邂逅青門翁  
曾捋人間嚼

水仙 蘭

翩翩凌波仙  
靜挹君子德  
平生出處同  
相知不易得

菊花



百卉盡搖落獨傲清霜裏披榛見黃花淵明元不死

戲嬰圖

秘矣宮中戲人間那得窺開圖付一笑能不類兒嬉

送人遠宦思親還鄉

堂有期頤母天涯事遠游人生歸養樂薄宦一萍浮

題王立章雲山卷

岌々兩峰峙嵐光照寺門青山無今古白雲自朝昏

題扇上畫二首

老樹千年古精靈變化奇純陽有道士猶且被渠知  
古木排山立幽窓傍水開直疑林處士獨棹小舟回

題秋塘小景

寒溪上下碧水鳥去來輕衰柳傷秋色應知畫不成

近體六言

題習齋先生扇上畫

石罅脩篁肅爽水邊老樹槎牙氣味與翁相似歲寒長對蒼華

題扇上畫



蹇驢欲往何處落日空山莫鐘行到水邊幽寺白雲低覆青松  
近體七言絕句

小園即事

澹黃楊柳著煙輕細草茸，襯屐行，到水邊心會處夕陽一樹  
杏花明

南湖史君製暗香湯奇甚賦二絕求之

飛盡梅花重惜芳仙房想像製新湯猶疑清淺溪頭汲石鼎煎來  
水亦香

霧閣雲窓淡閉春微聞玉杵擣清聲玄霜祇許英，見地上詩人

渴夢生

時侍姬新至  
故戲及之

和南湖史君煙景墨梅圖

時聞有惠州  
新除

依約羅浮翠嶺前美人玉立破蒼煙畫圖未許分明見一夜春風  
入夢先

夏日南軒

並水軒窓宜夏居夜涼如水似秋初科頭枕石卧明月仰面迎風  
看太虛



出城道上有感

岸上征人水上舟古今行役夢悠悠  
恰如河畔青  
草死盡還生  
那得休

鄰圃求桂花并收墜英

萬里西風桂樹秋蟾宮雲箔夜香浮  
何當淨洗紅塵夢乞取一枝  
遮醉眸  
收拾殘英擣作湯小山風味不能忘  
敢煩即遣蒼頭去埽取黃金  
一斛強

題唐圉人調馬圖

飛龍天廐隘雲稠一匹驕馳掣電流  
櫪下髯奴真厮養眼中元不  
識驊騮

賦桂山 其人善琴書大字

小山桂樹碧雲西三疊琴心月未低  
曲罷便乘蒼鳳去廣寒瓊牖  
要新題

贈恒齋葛太醫

吳下謙  
抱朴孫妙年應遇長桑君素心皦  
恒如月一寸靈苗



手自耘

人間無地不巖嶽刺眼醫門劔戟森  
摻術不為流俗變始知夫子

有恒心

小少煙霞痼疾深已將鐘鼎等山林  
年來更有耽玄癖煩向膏肓

為一鍼

濟南趙君成南使羈留三紀得還其猶子  
錄其遺事

求詩為賦一絕

三十六迴秋月明年望斷鴈南征  
蘇郎皓首還鄉去媿殺當時

李少卿

吳市售藥

山夫聊作市廛居漫學壺公計已疎  
收卷向來經濟策按頭唯集

古方書

題山水扇二首

青山綠樹蔽層樓應有高人隱一丘  
客子門前過何急古今行役

未曾休

江上曾峰擁翠螺人煙隱見巖阿泊舟  
二子登平陸遮莫風波



柰爾何

樂府

水龍吟 壽白蘭谷

此翁疑是香山老來愈覺才情富天孫借與金刀玉尺裁雲縫霧  
一曲陽春樽前唯欠柳蠻櫻素對蒼松翠竹江空歲晚伴明月傾  
芳醕 深谷脩蘭楚續離騷載歌初度麻姑素約天寒相訪遺  
余瓊露擬借青鸞吹笙碧落采芝玄圃柰玉堂催召文園醉叟草  
凌雲賦

賀新郎

壽黃春谷時自南州過浙右相宅合卺有期適逢壽日

丹鳳翔雲表覽德輝翩然飛下翠蓬仙島銀漢無聲天如水昨夜  
新涼多少前夕聽一曲瓊簫音渺千尺秦臺凌空峻見一雙翠羽  
先飛到披紫霧攬瑤草風流別乘當英妙對江山掀髯把酒浩  
歌長嘯綠髮公侯何足浼自是無雙才調況槐蔭青天杪月殿  
姮娥雲深處近清秋丹桂催開早斟綠醕戴花帽

沁園春 次白蘭谷韻

浪迹煙霞有酒千鍾有書五車任從來蕭散閑心似水何堪嫵媚



笑面如靴濯髮滄浪放歌小海肯被紅塵半點遮誰知道抱無名  
鉅璞重價難賒 嘻嗟大澤龍蛇且蟠屈深潛得計些看淋漓醉  
墨神情自足摩挲雄劍肝膽無邪渭水煙蓑營丘繡衮出處何嘗  
有異耶今何在但素蟾東出紅日西斜

齊天樂 八月十八日壽婦翁號菊圃

秋濤玉漲西陵渡江亭曉來雄觀帝子吹笙洛妃起舞應喜蓬宮  
仙誕斗墟東畔望縹渺星槎來從河漢明月樓臺繡筵重啟曼桃  
燕 莊樵一樹翠色五枝勞桂長金蕊玉榦自笑狂踪樽前起壽

不似衛郎溫潤一卮泥滿羨彭澤風流醉中長岸老圃黃花清香  
宜歲晚

西江月 製香

龍沫流芳旒，犀沈鋸屑霏，薇心玉露練香泥壓盡人間花氣  
銀葉初溫火緩金猊靜裊煙微此時清賞只心知難向人前舉似

虞美人 題玉環玩書圖

玉搔斜壓烏雲墮拄頰看書卧開元天子惜娉婷一笑嫣然何事  
便傾城 馬嵬風雨歸時路艷骨銷黃土多情誰寫畫圖中江水



江花千古恨無窮

洞仙歌 八月十七日壽畊參夫人時命羽士設醮

銀波湛碧遙汎仙槎早婺宿熒煌瑞雲曉度芳傳丹桂歡動連枝  
稱壽處一簇蓬萊翠窈步虛聲婉轉清徹瑤壇疑是鈞霄鳳音  
渺正金姥禮虛皇天階淨涼八綃衣風裊想金書秘字賜長生進  
九醞霞卮練顏長好

銘

梅山銘

子華甫隱於藥而寄興於梅嘗以梅山自號請銘於余廼  
為之銘曰

天地變化其機不停玄陰既極萬物用貞由剝而復微陽始升蒼  
山洩寒幽花獨馨玉質朗耀鐵枝崢嶸皓雪讓潔素月並清得氣  
之先斯仁之萌自華而實斯仁之成吾宗子華攬元化英觀梅於  
山而得養生寓仁于術慈視孩嬰充之自茲以達八紘

贊

俞時中小像贊 服蒙古服手執周易一卷



渥丹其顏如戟其鬚服今之服執古之書吾聞古今殊涂有如舟  
車如者自達愚者拘、唯易之道變化不居孰為俞子而作是圖  
蓋將示我隨時之義君子之中乎

老子贊

超物先妙自然見之者猶龍焉貫三極垂二篇疇復識玄之玄

寧極齋藁

陳清全先生詩藁藏于菽溪王寧遠  
氏泰昌改元八月十日張丑敬觀





